

ETB digitalean Iruñerrian

UPNREN Gobernuak Eusko Jaurlaritzaren egitekoa zela zioen, baliabide ekonomikoak hark jarri behar zituela... Gobernu aldaketarekin batera etorri da albistea: Iruñerrian, ETBren lau kateak Lurreko Telebista Digitalaren bidez ikusi ahal izango dira hemendik aurrera. Orain arte ETB1 eta ETB2 modu analogikoan ikus zitezkeen eta ETB3 eta ETB4 internet bidez baino ez. Iruñerriko herri-tarrek telebista bersintonizatu behar-ko dute Erreniega eta Ezkaba mendietako errepikagailuen seinalea ondo jasotzeko. Eusko Irratiko irratia ere digitalean zabalduko dira.

GUTXITAN BEZALA, Eusko Legebiltzarrean, euskarari lotutako gaitatean, adostasuna lortu dute bost alderdi politikok. Euskara tituluak, tartean egiaztagiri ezagunena den EGA, aztertuko dituzte probaren maila, edukiak eta emaitzak ebaluatzeko. EAJk, EH Bilduk eta PSE-EEk adostu zuten testua, eta PPK eta UPDk baiezkua eman bozketan.

Ezin esan alderdien adostasun-erako zioak berdinak izan direnik. Anjel Lertxundik urriaren 24ko *Berrian* jolas polita jarri zien irakurleei: “Talde politiko guztiak

etorri dira bat norabidea aldatu behar horretan, baina lupatxo batez begiratu bagenitu alderdi bakoitzaren motiboak, elkarren arteko talkak eta desberdintasun esanguratsuak topatuko genituzke. Joko polit bat proposatu nahi dizuet asteburu euritsurako. Adi, eta zorte on: zein alderdik erlatibizatu zuen titularen garrantzia; zein alderdik aipatu zuen bi hizkuntzen arteko asimetria; zeinek esan zuen ez direla EGAREN maila jaisteaz ari, orientazio filologikoaren pisua murrizteaz baizik; zein alderdik lehenetsi zuen porrot mailaren handia; zeinek proposatu zuen EGA eskatzea “behar denean soilik”.

Eusko Legebiltzarrek jarri dizkio etxeko lanak Eusko Jaurlaritzari. Lau hilabeteko epean probaren egoera ikertu beharko du eta hobekuntzak proposatu beharko ditu, errealitate soziolinguistikoari eta bete behar dituen funtzioei erantzun ahal izateko.

G. R. / ARGAZKI PRESS



5.000 lagun bildu ziren urriaren 24an, Baionan, Deiadar manifestazioan. Leloak honela zioen: “Estatus bat lurraldearentzat, Estatus bat hizkuntzarentzat”. Montpellier (Okzitania), Ajaccio (Korsika) eta Carhaixen (Bretaina) ere egin ziren elkarretaratzeak.

EKONOMIAREN TALAIA • TERMOMETROA

Pobre gehiegi, Euskal Herri aberatsean

EUSKAL HERRIA ABERATSA DA, baina ez dirudi ondo banatuta dagoenik, pobrezia handia baitago. Ondorio hori atera liteke joan den astean Gaindegia behategiak publiko egindako txostenetik. Euskal Herriaren biztanleriaren %16,7, hau da, 3.124.259 lagunetik 521.751 pobrezian edo bazterketa sozialera jausteko zorian bizi da. Urtean 7.961 euro baino gutxiagorekin irauten dute heldu bakarra bizi den etxeetan, 5.971rekin bi heldu dutenetan eta 4.179 euro baino gutxiagorekin bi heldu eta 14 urtetik beherako bi adingabe bizi diren etxeetan. Lurraldeka, pobrezia tasa altuena Ipar Euskal Herrian aurkituko dugu (%18,1), gero EAEko probintzietan (%15,1) eta azkenik Nafarroan (%14,5). Datu global horretatik, beste bat zehatzagoa: adingabeen %20 (104.764 gazte) pobrezian edo gizarte-bazterketarako arriskuan bizi da.

Eta hala ere, Hego Euskal Herrian biztanle bakoitzeko BPGa 30.000 euro ingurukoa da; horrek erakusten du euskal jendartearen egiaz aberatsa dela. Zerbait ez dabil ondo, aberastasuna hain gaizki banatuta egotea. Egoc-

ra horrek pentsarazi beharko lieke erakunde, gobernu eta eragile sozial guztiei, beharrezkoa dela hainbat politika martxan jartzea Euskal Herrian bizi diren eta lan egiten duten pertsona guztiek oinarritzko beharrianak aseta izan ditzaten. Beste behin, halakoek, gure jendartearen gailentzen den eredu sozioekonomikoa birpentsatzera garamatzate. Sistema kapitalistak pobretu egiten gaitu eta desberdintasun handiak sorrarazten ditu.

Iragan asteburuan, 150 eragile sozialen eskutik, mila-lagunek hartu dute parte Bilbon egindako Alternatiben Herria ekimenean (ikusi ARGIA honen 44. orrialdean), erakutsiz badaudela sistema neoliberal kapitalistatik haragoko bideak. Aukera daukagu bestelako eredu sozio-produktiboa eraiki eta aberastasuna modu justuagoan banatzeko; baliabideak ditugu kalitatezko enplegua sortzeko, lana banatu eta pobrezia eta desberdintasun sozialak nabarmen jaisteko. Borondate politikoa behar da. Euskal jendarteak du hitza eta konpromiso solidarioa.

Juan Mari Arregi